

Bouônjour. Ch'est mé Brian Vibert, ieun des gris ventres d'la Paraïsse dé Saint Ouën, aue la Lettre Jèrriaise chu Sanm'di lé 9 dé Septembre et ch'est man pliaïsi dé chârer aue vous les préchaines chîn minnutes dans not' langue si précieuse.

J'nos trouvons acouo eune aut'fais dans la période dé not' histouaithe quand tout couôte dé pus en pus et bein des gens sont hardi gênés, souvent séthieusement à court dé sou, et n'sachant pon comment payi lus dettes. Les charités tch'offrent d'la nouôrritthe èrchèvent dé pus grands nombres qué janmais et nou ouait pâler, aue l'Hivé tch'appaiche, des cheins tch'éthont à chouaïsi entre mangi ou caûffer la maïthon. Et bein des propriêtaïthes tch'ont eune hypothèque sus lus maïthon s'trouvent en diffitchulté aue la haûch'thie dé l'intéthêt d'la banque même tch'il ont un bouon r'venu. Ch'est eune période quand i' faut ajuster et i' faut qu' les riches vaient l'opportunité dé donner un coup d'main.

Ch'a 'té chutte dreine sémaine qué l's écoles ont r'c'menchi après les vacances d'Êté et j'veins d'liéthe qué y'a un d'bat au sujet d'unniforme pour l's êcoliers. Comme ailleurs lé prix a augmenté et i' y'a bein des fanmil'yes tchi n'peuvent pon affaûrder d'acater l'unniforme spécifié. Lus êfants ont d'autres habits respectabl'yes et i' dev'thaient pouver chouaïsi chein tch'i' portent châque jour. Mais pour plusieurs l'unniforme est vraiment împortant donnant identité et sîngnificâtion partitchulyi à châque étudiant et à l'êcole même. Lé d'bat continue aue eune sélection dé points d'veue et i' faut espêther qué les cheins tchi décident s'sont sages et justes.

Dans chutte période dé restrictions dé finance i' y'en a acouo, heûtheusement, tchi peuvent viagi et j'vins d'pâsser huit jours en France. Lé baté Condor 'tait patchi dé touristes et visiteurs en allant et en r'venant et l'café et la boutique fitent un commerce continuuel – autchun sîngne dé manque d'argent! Et en France où'est qu'les prix ont haûchi comme ailleurs, restaurants, hôtels, boutiques et supèrmarchiers n'taient pon sans clientèle – autchun sîngne dé manque d'argent!

J'avêmes not' vouaituthe et j'restîmes dans St-Michel-Chef-Chef dans la Loire Atlantique. Ch'est eune commune au Sud dé St Nazaire et à l'Ouest dé Nantes, et tout près d'la grève sus la Côte dé Jade. Ch'est un vraiment bieu canton et j'eûmes bouôn solé et l'opportunité dé nos r'poser et dé visiter d'autres lieux. À 20 kilomètres au Sud-Ouest dé St-Michel est l'île dé Noirmoutier dans l'département d'la Vendée. L'accès est par lé Passage du Gois, eune route à traverser à basse-ieau; autrément i' y'a un magnifique pont qué j'crouaïsîmes. Tchi belle journée qué j'eûmes à visiter l'châté, les p'tites baies, la ville p'ncipale et à jouie d'un pique-nique dans ieun des plusieurs endroits rêservés pour les cheins tch'aiment mangi d'houors.

À la fin dé nos huit jours i' fallait faithe lé trajet à St Malo – deux heuthes et d'mie sus la route – mais j'finmes un détou pour un r'pas à la broche dans la fanmeuse Terrasse dé l'Abbaye à Paimpont où'est qué j'mangîmes aue au mains deux chents autres

pèrsonnes. Acouo eune fais – autchun sîngne dé manque d'argent!
Et bein – en v'là assez pouor aniet. Mèrcie pouor aver êcouté et ayiz tous eune bouonne
sémaine.

À la préchain.